

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

- प्रधानमंत्री नरेन्द्र मोदी होर उत्तर प्रदेश च मेरठ थमां चुनां अभियान दी शुरूआत करगंन।
- INDIA गठबंधन आस्सेआ अज्ज नमीं दिल्ली दे रामलीला मैदान च सेव डैमोक्रेसी रैली दा आयोजन करा'रदा ऐ।
- आँदे लोकसभा चुनाएं थमां पैह्ला सुरक्षाबलें जम्मू कश्मीर च फलैग मार्च कीता।
- वित्त मैहकमे नै अंतरिम बजट दे पूंजीगत खर्च ते राजस्व खर्च दा 50 फीसद जारी करने दे निर्देश दित्ते।
- भारतंड मंदर गी नमें सिरैया सुआरने दा कम्म कीता जाग। इस सरबंघै च अगले हफते अफसरें दी बैठक लगा करदी ऐ।

<><><><><><>

## PM-Election

भारतीय जनता पार्टी दे वरिष्ठ नेता ते प्रधानमंत्री नरेन्द्र मोदी होर अज्ज उत्तर प्रदेश च चुनां अभियान दा शुभारंभ करगंन। ओह मेरठ च जनसभा गी संबोधत करगंन। बीजेपी नै टीवी सीरियल रामायण थमां प्रसिद्ध होए दे अरुण गोविल होरें गी मेरठ लोकसभा हल्के थमां मेदवार बनाया ऐ। उत्तर प्रदेश दे मुख्मंत्री योगी आदित्यनाथ, राष्ट्रीय लोक दल दे प्रमुख जयंत चौधरी ते बीजेपी दे दुए नेता इस मौके पर मजूद होंगन। उत्तर प्रदेश च 7एं गेड़ें च मतदान होना ऐ। भारतीय जनता पार्टी दे नेतृत्व आले राष्ट्रीय जनतांत्रिक गठबंधन एनडीए नै परतियै केन्द्र च सत्ता च आँने दा विश्वास जताया ऐ ते एहदे लेई उत्तर प्रदेश सब्बनें शा बद्ध 80 संसदीय सीटें कन्नै महत्वपूर्ण साबत होग।

<><><><><><>

## Opposition March

विपक्ष दे INDIA गठबंधन आस्सेआ अज्ज नमीं दिल्ली दे रामलीला मैदान च "लोकतंत्र बचाओ" रैली यानि सेव डैमोक्रेसी रैली दा सरिस्ता कीता जा'रदा ऐ।

रैली च कांग्रेस, एनसीपी, शिव सेना, समाजवादी पार्टी, आम आदमी पार्टी, डीएमके, नैशनल कांग्रेस, झारखंड मुक्ति मोर्चा, वामपंथी ते होर दुइएं पार्टियों दे मुख् लीडर हिस्सा लै करदे न। जम्मू कश्मीर थमां नैशनल कांग्रेस दे प्रधान डॉ. फारुक अब्दुल्ला दिल्ली दे रामलीला मैदान च लोकतंत्र बचाओ रैली च शामिल होंगन। ओह नैशनल कांग्रेस दी नुमायंदगी करगन। रैली दे सरबंघै च बोलदे होई कांग्रेस दे लीडर जयराम रमेश होरें आक्खेआ जे देसै च बघा'रदी मैहगाई, बेरोजगारी, आर्थिक ना-बरोबरी ते समाजी धुवीकरण रैली च मुख् मुद्दे होंगन।

<><><><><><><><>

## Flag March

लोकसभा चुनाएं शा पैहले मतदाताएं च सुरक्षा ते बसाह् भरोसे आली भावना पैदा करने दे मकसद कन्ने सुरक्षाबलें कल जम्मू कश्मीर दे बक्ख-बक्ख जिलें च फ्लैग मार्च कीता। केन्द्र शासत प्रदेश च लोकसभा चुनां 5 गेड च होंगन। जिंदे च 19 अप्रैल गी उधमपुर, 26 अप्रैल गी जम्मू, 7 मई अनंतनाग-राजौरी, 13 मई गी रीनगर ते 20 मई गी बारामुला संसदीय सीट लेई वोट पाए जांगन। वोटें दी गिनतरी 4 जून गी होग। कश्मीर घाटी दे गांदरबल, बारामुला, पुलवामा, कुलगाम, सोपोर? शोपिया, बांदीपोरा ते बडगाम सनें बक्ख-बक्ख जिलें च जिला पुलस ते केन्द्री थेआरबंद बल आस्सेआ फ्लैग मार्च आयोजित कीते गे। एहदे च जुआनें ते वरिष्ठ अफसरें दी हिस्सेदारी दिक्खी गई। पुलस प्रवक्ता नै आक्खेआ जे फ्लैग मार्च दा मकसद मतदाताएं च सुरक्षत ते बेहतर माहौल पैदा करना ऐ तां जे ओह बिजन कुसै डर-त्राह दे चुनावी प्रक्रिया च हिस्सा लेइ सकन। प्रवक्ता नै दस्सेआ जे सुरक्षा बलें राजौरी दे मुख् शैहर ते जम्मू प्रांतै च नेकें थाहरें फ्लैग मार्च कीता।

<><><><><><><><>

## Nomination Jammu Lok Sabha

जम्मू लोकसभा हल्के थमां दो होर मेदवारें कल अपना नामांकनपत्र भरेआ ऐ। इस संसदीय हल्के च 26 अप्रैल गी वोट पाए जाने न। बीजेपी दे मेदवार जुगल किशोर शर्मा ते आजाद मेदवार सुरिन्दर सिंह होरें अपना नामांकन भरेआ। अजें तगर इस हल्के लेई 4 मेदवारें अपना नामांकन दर्ज कीता ऐ। इस हल्के लेई नामांकन पत्र भरने लेई खीरी तरीक 4 अप्रैल ऐ।

<><><><><><><><>

## Candidate Udhampur

उधमपुर पार्लिमानी हल्के लेई नामजदगी पावस परताने दा कल खीरी ध्याड़ा हा। इस हल्के लेई कुल 12 मेदवार चुनां मैदान च न। आकाशवाणी जम्मू संवाददाता दी रिपोर्ट मूजब जेहड़े मेदवार चुनां मैदान च न, उंदे च बहुजन समाज पार्टी दे अमित कुमार, जम्मू कश्मीर नैशनल पैथर्स पार्टी दे बलवान सिंह, बीजेपी दे डॉ. जितेन्द्र सिंह, कांग्रेस पार्टी दे मेदवार चौधरी लाल सिंह, एकम सनातन भारत दल दे मनोज कुमार हुंदे इलावा डॉ. पंकज शर्मा, राजेश मनचंदा, सचिन गुप्ता, जी.एम.सरूरी, स्वर्णवीर सिंह जुरालख मोहम्मद अली गुज्जर मे मेहराल दीन होरें आजाद मेदवार दे तौरा पर शामिल न। इस हल्के च पैहले गेड़ तैहत 19 अप्रैल गी मतदान होना ऐ। रिटर्निंग अफसर आस्सेआ मेदवारें गी चुनावी नशान देने दी प्रक्रिया पूरी करी लैती गई ऐ।

<><><><><><>

## LG-Easter

उपराज्यपाल मनोज सिनहा होरें जम्मू कश्मीर दे लोकें गी ते खास तौर पर ईसाई समुदायें दे लोकें गी ईस्टर दियां शुभकामनां दित्तियां न। आकाशवाणी जम्मू संवाददाता दी रिपोर्ट मूजब उपराज्यपाल होरें अपने सनेए च लोकें गी ईस्टर दियां शुभकामनां दित्तियां। उनें गलाया जे ईस्टर बुराइ पर अच्छाई ते झूठ पर सच दी जित्त दा प्रतीक ऐ। उनें गलाया जे प्रभु ईसा मसीह हुंदे परतियै जीवित होई जाने दे चेते च मनाया जाने आला ईस्टर असें गी प्यार, करुणा, दया ते क्षमा दा चेता दोआंदा ऐ। उनें मेद जाहर कीती जे एह आपसी भाई-चारे दिएं तंदे गी मजबूत करोग ते सब्बने लेई खुशी, मेद ते खुशहाली लेइयै औग।

<><><><><><>

## FD Interim Budget

कल पैहली अप्रैल थमां शुरू होआ करदे नमें माली ब'रे दी शुरूआत दे कन्नै गै वित्त मैहकमे नै इस ब'रे फरवरी च संसद आस्सेआ अनुमोदित जम्मू कश्मीर दे अंतरिम बजट दे पूंजीगत खर्च ते राजस्व खर्च दा 50 फीसदी जारी करने दा कल आदेश जारी। वित्त मैहकमें आस्सेआ इस सरबंधे च कल दऊं बक्ख-बक्ख हुक्म जारी कीते गे। मैहकमे नै सब्बै विभागें, जिला विकास कमीशनरें दे पक्खै च कैपेक्स ते राजस्व बजट तैहत मंजूरी दित्ती। इनें हुक्मे मताबक सब्बने मैहकमे दे निदेशक वित्त निदेशक योजना वित्तिय सलाहकार ते नियंत्रण अफार कम्म योजना दे अनुमोदन दे कन्नै बीम्स पोर्टल पर अपलोड करने ताई जाति तौरा पर जिम्मेदार होंगन।

एह कम्म 20 अप्रैल 2024 जां एह्दे शा पैहले सरबंधत अफसरें थमां मंजूरी परेंत तोड़ चाढ़ने लेई आक्खेआ गेआ ऐ। इस्से चाल्ली जिला विकास कमीशनरें गी 30 अप्रैल जां औंदे शा पैहले इसी पेश करने दी ताकीद कीती गई।

<><><><><><>

## Martand Temple

अनंतनाग जिले च प्राचीन मार्तंड सूर्य मंदर दी सुरक्षा, संरक्षण ते उसी परतियै नमें सिरिया सुआरने सजाने पर गल्लबात करने लेई जम्मू कश्मीर प्रशासन नै अगले हफते दी इक बैठक सददी ऐ। इसी भारतीय, पुरातत्व सर्वेक्षण एएसआई आस्सेआ राष्ट्री महत्वै आली थाहर घोषत कीता गेआ ऐ। एह केन्द्री संरक्षित स्मारकें दी सूचि च बी आंदा ऐ। मई 2022 च उपराज्यपाल मनोज सिन्हा होरें मंदर च नवग्रह अष्टमंगला पूजा च हिस्सा लैता हा, जेहदा एएसआई आस्सेआ लोड़चदी इजाजत नेई लैने करियै नियमें दी खलाफवर्जी दे तौरा पर बरोध कीता गेआ हा। उआं जम्मू कश्मीर प्रशासन नै नियम 7(2) दा हवाला दिंदे होई पूजा दा बचा कीता हा।

<><><><><><>

## Rajasthan Diwas

जम्मू दे राजभवन च कल राजस्थान दिवस समारोह मनाया गेआ। आकाशवाणी दे जम्मू संवाददाता मूजब जम्मू कश्मीर च रौहने आले वरिष्ठ अधिकारी, विद्यार्थी ते राजस्थान दे निवासी इस समोराह च खास तौर पर सददे गेदे परौहने हे। इस मौके पर उपराज्यपाल मनोज सिन्हा होरें राजस्थान दे लोकें गी बधाई ते शुभकामनां दित्तियां।

<><><><><><>

## Traffic

रामबन जिले दे मेहद कैफटेरिया, दलवास ते किशतवाड़ी पाथेर इलाके च बड़ी मती बरखा करियै ल्हास पस्सियां पौने कारण जम्मू श्रीनगर राष्ट्रीय जरनैली शिड़क गड्डिडएं दी आओजाई लेई बंद होई गई ऐ। लोकें गी सलाह दित्ती गई ऐ जे ओ मौसम च सुधार ते शिड़कें दे साफ होने तगर एनएच-44 पर यात्रा करने थमां बचन.....

<><><><><><>

## Tawi Sahitya Lok Utsav

कला, संस्कृति ते भाषाएं अकादमी आस्सेआ इंदिरा गांधी सेंटरल फॉर आर्टस जम्मू दे सैहयोग कन्ने तवि साहित्य लोक उत्सव दा सरिस्ता कीता गेआ ऐ। कल इस उत्सव दे दुए रोज केई सारी साहित्यक ते सांस्कृतिक गतिविधिएं दा सरिस्ता कीता गेआ। आकाशवाणी जम्मू संवाददाता दी रिपोर्ट मूजब इस दरान गल्लबात आले सत्र कताब गी बी जारी करना, कविता पढ़ना ते कार्यशालाएं दा बी सरिस्ता होआ। संस्कृति मैहकमे च प्रधान सचिव सुरेश कुमार गुप्ता होरें हीना महाजन हुंदी किताब “जम्मू दी चिड़ी” दा विमोचन कीता।



## SVEEP Nowshera

मतदाताएं गी जागरूक करने लेई जम्मू कश्मीर च चलाए जा'रदे स्वीप अभियान तैहत राजौरी दी जिला स्वीप टीम आस्सेआ जिला चुनां अफसर ओ.पी.भगत हुंदी दिक्ख-रिक्ख च नौशहरा दे अगेत्रे इलाकें च मतदाताएं गी जागरूक करने लेई अभियान चलाया गेआ। आकाशवाणी जम्मू संवाददाता दी रिपोर्ट मूजब टीम नै सरकारी मिडल सकूल सरेया दा दौरा लाया ते स्कूल दे अमले, उत्थुआ दे बसनीकें गी वोट पाने बारे जानकार बनाया। इस दरान लोकें गी वोट पाने दे महत्व गी दस्सेआ गेआ। मकामी लोकें गी चुनां प्रक्रिया च सरगर्मी कन्ने हिस्सा लैने लेइ प्रेरित कीता गेआ। लोकतांत्रिक प्रक्रिया च हर इक वोट दी केह कीमत ऐ इस बारे बी जानकार बनाया गेआ।



## IPL

इंडियन प्रीमियर लीग क्रिकेट दे 11में मकाबले च कल लखनऊ सुपर जायंटस नै पंजाब किंग्स गी 21 रंजें कन्ने हराई दित्ता। एह मैच कल रातीं लखनऊ दे अटल बिहारी वाजपेयी इकाना क्रिकेट स्टेडियम च खेड्डेआ गेआ। पंजाब किंग्स 200 रंजें दे लक्ष्य दा पिच्छा करदे होई 5 विकटें दे नुकसान पर 178 रंज गै बनाई सकी। कप्तान शिखर धवन नै सब्बने शा मते 70 रंज जदके जॉनी बेयरस्टो नै 42 रंजें दी पारी खेड्डे। लखनऊ जायंटस लेई मयंक यादव नै 3 विकट लैते। लखनऊ सुपर जायंटस नै टॉस जित्तियै पैहले बल्लेबाजी दा फ़ैसला कीता ते 8 विकटें पर 199 रंज बनाए। क्विंटन कॉक नै सब्बने शा मते 54 रंज ते क्रुनाल पांडया नै 43 रंजें दा जोगदान दित्ता। पंजाब किंग्स दी तरफा सैम करन नै 3 विकटां लैतियां। मयंक यादव गी प्लेयर ऑफ द मैच घोषत कीता गेआ। आईपीएल च अज्ज दऊं मैच खेड्डे जांगन।

पैह्ला मकाबला दपैहरी साढे 3 बजे शा अहमदाबाद दे नरेन्द्र मोदी स्टेडियम च गुजरात टाइटन्स ते सनराईजर्स हैदराबाद बश्कार होग। दुए मकाबले च संजा साढे 7 बजे विशाखापत्तनम दे वाई.एस.राजशेखर रेड्डी स्टेडियम च चेन्नई सुपर किंग्स ते दिल्ली कैपिटल्स बश्कार मैच खेड्डेआ जाग।

<><><><><><>